

四庫全書

史部

欽定四庫全書

元史卷一百十九

明翰林學士亞中大夫知制誥兼修國史宋 濂等修

列傳第六

穆呼哩

穆呼哩扎拉爾氏世居鄂諾水東父崆根果幹以戚里故在太祖麾下從平默爾奇斯征奈曼數立功後奈曼又叛太祖與六騎走中道乏食擒水際索駝殺之燔以

啖太祖追騎垂及而太祖馬斃五騎相顧駭愕崆根果
幹以所乘馬濟太祖身當追騎死之太祖獲免有子五
人穆呼哩其第三子也生時有白氣出帳中神巫異之
曰此非常兒也及長沉毅多智猿臂善射挽弓二石強
與博爾濟博囉罕齊拉衮事太祖俱以忠勇稱號都爾
本庫魯克猶華言四傑也太祖軍嘗失利會大雪失牙
帳所在夜卧草澤中穆呼哩與博爾濟張裘羶立雪中
障蔽太祖達旦竟不移足一日太祖從三十餘騎行谿

谷間顧謂曰此中或遇寇當奈何對曰請以身當之既而寇果自林間突出矢下如雨穆呼哩引弓射之三發中三人其酋呼曰爾為誰曰穆呼哩也徐解馬鞍持之捍衛太祖以出寇遂引去克呼王汗與奈曼部相擊戰求援於太祖太祖遣穆呼哩及博爾濟等救之盡殺奈曼之衆于阿勒台之下獲甲仗馬牛而還既而王汗謀襲太祖其下巴爾台知之密告太祖太祖遣穆呼哩選精騎夜斫其營王汗走死諸部大人聞風款附歲丙寅

太祖卽皇帝位首命穆呼哩博爾濟為左右萬戶從容
謂曰國內平定汝等之力居多我與汝猶車之有轅身
之有臂也汝等切宜體此勿替初心金之降者皆言其
主璟殺戮宗親荒淫日恣帝曰朕出師有名矣辛未從
伐金薄宣德遂克德興壬申攻雲中九原諸郡拔之進
圍撫州金兵號四十萬陣野狐嶺北穆呼哩曰彼衆我
寡弗致死力戰未易破也率敢死士策馬橫戈大呼陷
陣帝麾諸軍並進大敗金兵追至澮河殪尸百里癸酉

攻居庸關壁堅不得入遣別將哲伯統兵趨紫荆口金
左監軍高琪引兵來拒不戰而潰遂拔涿州因分兵攻
下益都濱棣諸城遂次霸州史天倪蕭伯特率衆來降
並奏為萬戶甲戌從圍燕金主請和北還命統諸軍征
遼東次高州盧琮金朴以城降乙亥裨將蕭額森以計
平定東京進攻北京金守將伊木沁率衆二十萬拒花
道逆戰敗之斬首八萬餘級城中食盡契丹軍斬關來
降遂逼之其下殺伊木沁推音達琿為帥舉城降穆呼

哩怒其降緩欲坑之蕭額森曰北京為遼西重鎮既降而坑之後豈有降者乎從之奏音達琿留守北京以烏頁爾權兵馬都元帥鎮之遣高德玉劉布斯格爾招諭興中府同知烏里布不從殺布斯格爾德玉走免未幾吏民殺烏里布推土豪石天應為帥舉城降奏為興中尹兵馬都提控錦州張鯨聚衆十餘萬殺節度使稱臨海郡王至是來降詔穆呼哩以鯨總北京十提控兵從多果朗南征未附州郡穆呼哩密察鯨有反側意請以

蕭額森監其軍至平州鯨稱疾逗留復謀遁去監軍蕭
額森執送行在誅之鯨弟致憤其兄被誅據錦州叛畧
平灤瑞利義懿廣寧等州穆呼哩率蒙古布哈等軍數
萬討之州郡多殺致所署長吏降進逼紅羅山主將杜
秀降奏為錦州節度使丙子致陷興中府七月進兵臨
興中先遣烏頁爾等攻溜石山諭之曰今若急攻賊必
遣兵來援我斷其歸路致可擒也又遣蒙古布哈屯永
德縣東俟之致果遣鯨子東平將騎兵八千步卒三萬

援溜石蒙古布哈引兵趨之馳報穆呼哩夜半引兵疾馳遇於神水縣東夾擊之分麾下兵之半下馬步戰選善射者數千令曰賊步兵無甲疾射之乃麾騎兵齊進大敗之斬東平及士卒萬二千八百餘級括開義縣進圍錦州致遣張太平高益出戰又敗之斬首三千餘級溺死者不可勝數圍守月餘致憤將校不戮力殺敗將二十餘人高益懼縛致出降伏誅廣寧劉瑛懿州田和尚降穆呼哩曰此叛寇存之無以懲後除工匠優伶外

悉屠之拔蘇復海三州斬完顏仲嘉努咸平宣撫富森等率衆十餘萬遁入海島丁丑八月詔封太師國王都行省承制行事賜誓券黃金印曰子孫傳國世世不絕分鴻吉哩伊奇喇斯烏嚕古莽果等十軍及烏頁爾契丹番漢等軍並屬麾下且諭曰太行之北朕自經畧太行以南卿其勉之賜大駕所建九旂大旗仍諭諸將曰穆呼哩建此旗以出號令如朕親臨也乃建行省于燕雲以圖中原遂自燕南攻遂城及蠡州諸城拔之冬破

大名府遂東定益都淄登萊濰密等州戊寅自西京由
大和嶺入河東攻太原忻代澤潞汾霍等州悉降之遂
徇平陽金守臣棄城遁以前鋒托卜安扎爾統蒙古軍
鎮之拒金兵以義州監軍李廷植之弟守忠權河東南
路帥府事己卯以蕭特穆爾等出雲朔攻降哥嵐火山
軍以誥里濟達為元帥達魯噶齊攻拔吉陽州擊絳州
克之庚辰復由燕徇趙至滿城武仙舉真定來降權知
河北西路兵馬事史天倪進言曰今中原粗定而所過

猶縱兵抄掠非王者弔民之意也穆呼哩曰善下令禁
無剽掠所獲老稚悉遣還田里軍中肅然吏民大悅兵
至潞陽金邢州節度使武貴迎降進攻天平寨破之遣
蒙古布哈分兵畧定河北衛懷孟州入濟南嚴實籍所
隸相魏磁沼恩博滑濬等州戶三十萬詣軍門降時金
兵屯黃陵岡號二十萬遣步兵二萬襲濟南穆呼哩以
輕兵五百擊走之遂會大軍薄黃陵岡金兵陣河南岸
示以死戰穆呼哩曰此不可用長兵當以短兵取勝令

騎下馬引滿齊發亦下馬督戰果大敗之溺死者衆進
攻楚丘楚丘城小而固四面皆水令諸軍以草木填塹
直抵城下嚴實率所部先登拔之攻下單州圍東平以
實權山東西路行省戒之曰東平糧盡必棄城走汝伺
其去即入城安輯之勿苦郡縣以敗事也留蘇魯克圖
以蒙古軍三千屯守之辛巳四月東平糧盡金行省孟
古奔汴蘇魯克圖邀擊之斬七千餘級孟古引數百騎
遁去實入城建行省撫其民先是郡王岱遜攻洺不下

至是遣石天應拔之五月還軍野狐嶺宋連水忠義統
轄石珪來降以為濟兗單三州都總管予綉衣玉帶勞
之曰汝不憚跋涉數千里慕義而來尋當列奏賜汝高
爵爾其勉之京東安撫使張琳亦來降以琳行山東東
路益都滄景濱棣等州都元帥府事鄭遵亦以棗鄉舊
縣降陞為完州以遵為節度使行元帥府事秋八月從
駐青家監國公主遣使來勞大饗將士由東勝渡河西
夏國李王請以兵五萬屬馬冬十月復由雲中歷太和

寨入葭州金將王公佐遁以石天應權行臺兵馬都元帥進取綏德破馬蹄寨距延安三十里止舍金行省完顏哈達出兵三萬陣于城東蒙古布哈以騎三千覘之馳報曰彼見吾兵少有輕敵心明日合戰當佯敗可以伏兵取勝也從之夜半以大軍銜枚齊進伏於東城十五里兩谷間明日蒙古布哈進兵望見金兵即棄鼓旗走金兵果追之伏發鼓聲震天地萬矢齊下金兵大敗斬七千級獲馬八百哈達走保延安圍之旬日不下乃

南徇洛川克鄜州北京權帥石天應擒送金驍將張鐵槍穆呼哩責其不降厲聲答曰我受金朝厚恩二十餘年今事至此有死而已穆呼哩義之欲解其縛諸將怒其不屈竟殺之遂降坊州大饗士卒聞金復取隰州以希禪為經畧使於是復由丹州渡河圍隰克之留和卓統蒙古軍鎮石隰間以田雄權元帥府事壬午秋七月令蒙古布哈引兵出秦隴以張聲勢視山川險夷大兵道雲中攻下孟州四蹄寨遷其民于州拔晉陽義和寨

進克三清巖入霍邑山堡遷其人於趙城縣薄青龍堡
金平陽公胡天祚拒守裨將富察鼎珠監軍王和開壁
降遷天祚于平陽八月有星晝見隱士喬靜真曰今觀
天象未可征進穆呼哩曰主上命我平定中原今河北
雖平而河南秦鞏未下若因天象而不進兵天下何時
而定耶且違君命得為忠乎冬十月過晉至絳拔榮州
胡瓶堡所至望風歸附河中久為金有至是復來歸穆
呼哩召石天應謂曰蒲為河東要害我擇守者非君不

可乃以天應權河東南北路陝右關西行臺平陽李守
忠太原攸哈喇巴圖魯州田雄並受節制命天應造浮
梁以濟歸師乃渡河拔同州下蒲城徑趨長安金京兆
行省完顏哈達擁兵二十萬固守乃分麾下烏爾古納
台哈布哈兵六千屯守之遣昂吉將兵三千斷潼關遂
西擊鳳翔月餘不下謂諸將曰吾奉命專征不數年取
遼西遼東山東河北不勞餘力前攻天平延安今攻鳳
翔皆不下豈吾命將盡耶乃駐兵渭水南遣蒙古布哈

南越牛嶺關徇宋鳳州而還時中條山賊侯七等聚衆
十餘萬伺大兵既西謀襲河中石天應遣別將吳權府
引兵五百夜出東門伏兩谷間戒之曰侯賊過半急擊
之我出其前爾攻其後可克也吳權府醉酒失期天應
戰死城陷賊燒燬廬舍殺掠人民還走中條先鋒元帥
安扎爾邀擊敗之斬數萬級侯七復遁去穆呼哩以天
應子烏格襲領其衆癸未春師還浮梁未成顧諸將曰
橋未畢工安可坐待乎復攻下河西堡寨十餘三月渡

河還聞喜縣疾篤召其弟岱避曰我為國家助成大業
擐甲執銳垂四十年東征西討無復遺恨第恨汴京未
下耳汝其勉之薨年五十四厥後太祖親攻鳳翔謂諸
將曰使穆呼哩在朕不親至此矣至治元年詔封崆峒
米幹推忠效節保大佐運功臣太師開府儀同三司上
柱國魯國王謚宣忠穆呼哩體仁開國輔世佐命功臣
太師開府儀同三司上柱國魯國王謚忠武子博囉嗣
博囉沈毅魁傑寬厚愛人通諸國語善騎射年二十七

入朝行在所時太祖在西域夏國主李王陰結外援蓄異圖密詔博囉討之甲申秋九月攻銀州克之斬首數萬級獲生口馬駝牛羊數十萬俘監府塔爾海命都元帥蒙古布哈將兵守要害而還乙酉春復朝行在所同知真定府事武仙叛殺都元帥史天倪脅居民遁于雙門寨仙弟質於軍中挈家逃歸遣賽罕追及於紫金關斬之命天倪弟天澤代領帥府事丙戌夏詔封功臣戶口為食邑曰十投下博囉居其首宋將李全陷益都執

元帥張琳送楚州秋七月郡王岱遜率兵圍全于益都
冬十二月博囉引兵入齊先遣李喜孫招諭全全欲降
部將田世榮等不從殺喜孫丁亥春三月全突圍欲走
邀擊大敗之斬首七千餘級自相蹂踐溺死不可勝計
夏四月城中食盡全降諸將皆曰全勢窮出降非心服
也今若不誅後必為患博囉曰不然誅一人易耳山東
未降者尚多全素得人心殺之不足以立威徒失民望
表聞詔博囉便宜處之乃以全為山東淮南楚州行省

鄭衍德田世榮副之郡縣聞風款附山東悉平時滕州
尚為金守諸將或言炎暑未可進攻博囉曰主上親督
大軍平定西域數年未聞當暑不戰我等安敢自逸乎
遂促進兵金兵出戰敗之斬三千餘級其餘老幼開門
出降以州屬石天祿俾先鋒元帥蕭鼎爾台統蒙古軍
屯濟兗庫庫布哈以兵三千屯濰沂莒備宋千戶阿里
統大軍駐河北備金九月師還至燕獵于昌平民持牛
酒以獻卻之及還賜館人銀數百兩聞太祖崩趨赴北

庭哀毀邁疾戊子夏五月薨年三十二至治元年詔封
純誠開濟保德輔運功臣太師開府儀同三司上柱國
魯國王謚忠定子七人長塔斯次蘇肯徹爾次巴圖爾
次拜納次額默根次額布根次阿爾齊蘇

塔斯一名扎拉古幼與常兒異英才大畧綽有祖風穆
呼哩常曰成吾志必此兒也及長每語必先忠孝曰大
丈夫受天子厚恩當效死行陣間以圖報稱安能委靡
苟且目前以隳先世勲業哉年十八襲爵遂至雲中庚

寅秋七月叛將武仙圍潞州太宗命塔斯救之仙聞之退軍十餘里大兵未至塔斯率十餘騎覘賊形勢仙恐有伏不敢犯塔斯曰日暮矣待明旦擊之是夜五鼓金將伊喇布哈來襲我師與戰不利退守沁南賊還攻潞州城陷主將任存死之冬十月帝親征遣萬戶楊珠吉達與塔斯復取潞州仙夜遁邀擊之斬首七千餘級以任存侄代領其衆十一月帝攻鳳翔命塔斯守潼關以備金兵河中自石天應死復為金有辛卯帝親攻拔之

金元帥完顏和拉遁塔斯追斬之壬辰春睿宗與金兵相拒于汝漢間金步騎二十萬帝命塔斯與親王阿齊台昆布哈合軍先進渡河以為聲援至三峯山方與睿宗兵合金兵成列將戰會大雪分兵四出塔斯冒矢石先挫其鋒諸軍繼進大敗金兵擒伊拉布哈完顏哈達單騎走釣州追斬之遂拔釣州三月帝北還詔塔斯與呼圖克統兵畧定河南諸郡皆降惟汴京歸德蔡州未下塔斯遣使請曰臣之祖父佐興大業累著勲伐臣襲

世爵曾無寸效去歲復失利上黨罪當萬死願分攻汴城一隅以報陛下帝壯其言命卜之不利乃止癸巳秋九月從定宗于潛邸東征擒金咸平宣撫完顏萬努于遼東萬努自乙亥歲率衆保東海至是平之甲午秋七月朝行在所時諸王大會帝顧塔斯曰先皇帝肇開大業垂四十年今中原西夏高麗回鶻諸國皆已臣附惟東南一隅尚阻聲教朕欲躬行天討卿等以為何如羣臣未對塔斯對曰臣家累世受恩圖報萬一正在今日

臣雖駕鈍願仗天威掃清淮浙何勞大駕親臨不測之
地哉帝悅曰塔斯雖年少英風美績簡在朕心終能成
我家大事矣賜黃金甲玻璆帶及良弓二十命與王子
庫春總軍南征乙未冬拔棗陽庫春別徇襄鄧塔斯引
兵攻郢鄧瀕漢江城堅兵精且多戰艦塔斯命造木筏
遣汶上達魯噶齊劉巴圖爾將死士五百乘筏進擊引
騎兵沿岸迎射大破之溺死者過半餘皆走郢壁堅不
能下俘生口馬牛數萬而還丙申冬十月復出鄧州遂

至蘄黃蘄州遣使獻金帛牛馬犒師請曰宋小國也進貢大朝有年矣惟王以生靈為念乃捨之遂進拔符鎮六安縣焦家寨丁酉秋九月由八柳渡河入汴京守臣劉甫置酒大慶殿塔斯曰此故金主所居我人臣也不可處此遂宴於甫家冬十月復與昆布哈攻光州主將黃舜卿降昆布哈率兵別畧黃州塔斯攻大蘇山斬首數千級獲生口牛馬以千數戊戌春正月至安慶府官民皆遁于江東至北峽關宋汪統制率兵三千降遷之

尉氏三月朝行在所秋九月帝宴羣臣于行宮塔斯大
醉帝語侍臣曰塔斯神已逝矣其能久乎冬十二月還
雲中己亥春三月薨年二十八子蘇都爾幼弟蘇肯徹
爾襲蘇都爾既長別賜民三千戶為食邑得建國王旗
幟降五品印一七品印二付其家臣置官屬如列侯故
事蘇都爾薨子呼圖克華襲呼圖克華薨子呼圖克特
穆爾襲呼圖克特穆爾薨子寶格襲寶格薨子道通襲
蘇肯徹爾性嚴厲賞罰明信人莫敢犯與兄塔斯從太

宗攻鳳翔將兵抵潼關與金人戰皆有功既滅金皇子
庫春攻宋棗陽入郢蘇肯徹爾皆與焉及塔斯薨蘇肯
徹爾襲爵即上京之西阿爾察圖置營總中都行省蒙
古漢軍凡他行省監鎮事必先白之定其可否而後上
聞帝嘗遣使至見其威容凜然僮有奇氣所部軍士
紀綱整肅還朝以告帝曰真穆呼哩家兒也他國使有
至者每見皆倉皇失次不能措辭必慰撫良久始得盡
其所欲言左右或諫曰諸王百司既莫敢越而復示之

以威使人怖畏蓋少加寬恕以待之蘇肯徹爾曰爾言誠是然時有不同寬猛各有所宜施天下初附民心未安萬一守者自縱事變忽起悔之晚矣尋薨延祐三年贈宣忠同德翊運功臣太師開府儀同三司上柱國追封為東平郡王謚忠宣子四人曰和爾齊襲王爵曰納顏曰姜衛曰薩滿姜衛自有傳

納顏性謙和好學以賢能稱蘇肯徹爾薨憲宗擇於諸子命納顏襲爵納顏力辭曰臣有兄和爾齊當襲帝曰

朕知之然柔弱不能勝和爾齊亦固讓納顏頓首涕泣
力辭不得命既而曰若然則王爵必不敢受願代臣兄
行軍國之事於是和爾齊襲為國王事無巨細必與納
顏謀議剖決精當無所壅滯世祖在潛藩常與論事納
顏敷陳大義又明習典故世祖謂左右曰納顏後必可
大用因號之曰色辰猶華言大賢也納顏雖居顯要而
小心謹畏每誨羣從子弟曰先世從太祖皇帝出入矢
石間被堅執銳斬將奪旗勤勞四十餘年遂成功名以

故一家蒙恩深厚可謂極矣慎勿驕惰以墮先王之名
爾曹戒之病卒世祖聞之為之悲悼至正八年贈中奉
大夫遼陽等處行中書省叅知政事護軍追封魯郡公
子二人曰碩迪曰巴顏繼爾碩迪通敏有幹才世祖即
位入宿衛典朝儀後同知通政院事嘗言遼東溫綽濟
喇敏二種民數為寇宜遣近臣諭之帝方難其人僉曰
惟碩迪元勲世胄可使帝深然之以問碩迪對曰先臣
從太祖皇帝定天下不辭險艱以立勲業陛下不以臣

年少愚戇願請行帝大喜賜御衣錫燕以行碩迪至集
諸萬戶陳兵衝要詰其渠魁誅之脅從者皆降帝大悅
賞賚有差後從征納延及使西域屢建殊勲卒贈推忠
宣惠寧遠功臣謚忠敏加贈資善大夫嶺北等處行中
書省右丞上護軍追封魯郡公

巴圖爾從世祖征伐為先鋒元帥累立戰功世祖在潛
邸從容語巴圖爾曰今天下稍定我欲勸主上駐蹕回
鶻以休兵息民何如對曰幽燕之地龍蟠虎踞形勢雄

偉南控江淮北連朔漠且天子必居中以受四方朝覲
大王果欲經營天下駐蹕之所非燕不可世祖憮然曰
非卿言我幾失之己未秋命巴圖爾率諸軍由蔡伐宋
且移檄諭宋沿邊諸將遂與世祖兵合而南五戰皆捷
遂渡大江傳于鄂會憲宗崩于蜀額呼布格構亂和琳
世祖北還留巴圖爾總軍務以待命世祖至開平即位
還定都于燕嘗曰朕居此以臨天下巴圖爾之力也師
還中統二年卒于軍大德八年追贈推誠宣力翊衛功

臣太師開府儀同三司上柱國東平王謚武靖夫人特
穆爾昭睿順聖皇后同母姊也子四人長安圖次鼎通
次巴圖和坦他姬子曰和通襲國王安圖別有傳

托多爾台崆根果幹第三子岱遜郡王之後父曰孟克
從憲宗征伐累立戰功歲己未攻合州會憲宗崩命托
多爾台護靈駕赴北會額埒布格叛拘留數日逃歸追
騎執以北還將殺之親王烏蘇台裕隆達實曰托多爾
台乃太師國王之裔不可殺也遂獲免至元元年從烏

蘇台來歸世祖嘉之授懷遠大將軍佩金虎符世襲東
平達嚕噶齊命宿衛士四十人給驛送之官所莅官一
紀鎮靜不擾鄆人賴之以安卒年四十二子四人哲伯
幼嗜讀書習翰墨至元十四年監東平官少中大夫多
善政以清白稱嘗出家藏書二千餘卷置東平廟學使
學徒講肄之尋授嘉議大夫江南湖北道提刑按察使
改浙西大德四年入覲賜金段十疋明年春卒年五十
一子三人皆早喪自哲伯除按察使弟圖卜新嗣其職

圖卜新性淳靜喜怒不形知民疾苦而能以善道之早
嘗致禱即雨歲饑請於朝發廩以賑之睦同僚興學校
加太中大夫士民刻石紀其政績云卒年五十一子五
人長布拉噶齊次達實托音次鄂爾和次鄂勒哲布哈
次琉珠瑪皆以次嗣為東平達噶齊

托克托祖嗣國王蘇肯徹爾沉深有智畧奉命征討所
向克捷父薩滿幼穎異襁褓時世祖撫育之若子嘗挾
之南征同舟濟大江慮其有失繫之御榻及長常侍左

右帝嘗詔之曰男女異路古制也况掖庭乎禮不可不肅汝其司之既而近臣博囉銜命遽出行失其次薩滿怒其違禮執而囚之別室帝恠其久不至詢知其故命釋其罪薩滿因進曰今自陛下出陛下乃自違之何以責臣下乎帝曰卿言誠是也由是有意大任之會以疾卒不果年僅十有七托克托幼既失怙其母博囉罕篤意教之孜孜若恐不及稍長直宿衛世祖復親誨導尤以嗜酒為戒既冠儀觀甚偉喜與儒士語每聞一善言

善行若獲拱壁終身識之不忘至元二十四年從征納
顏帝駐驛於山巔旌旗蔽野鼓未作侯者報有隙可乘
托克托即擐甲率家奴數十人疾馳擊之衆披靡不敢
前帝望見之大加嗟賞遣使者勞之且召還曰卿勿輕
進此寇易擒也視其刀已折馬已中箭矣帝顧謂近臣
曰薩滿不幸早死托克托幼朕撫而教之常恐其不立
今能如此薩滿為有子矣遂親解佩刀及所乘馬賜之
由是深加器重得預聞機密之事其後哈坦復為亂成

宗時在潛邸督師往征托克托引衆率先躍馬蹙之其
衆大潰托克托馬陷于淖哈坦兵復進挑戰托克托弟
阿喇卜丹奮戈衝擊遂大敗之成宗即位其寵顧為尤
篤常侍禁闥出入惟謹退語家人曰我昔親承先帝訓
飭令毋嗜飲今未能絕也豈有為人知過而不能改者
乎自今以往家人有以酒至吾前者即痛懲之帝聞之
喜曰扎拉台如托克托者無幾今能剛制於酒真可大
用矣即拜資德大夫上都留守通政院使虎賁衛親軍

都指揮使政令嚴肅克修其職三年朝議以江浙行省地大人衆非世臣有重望者不足以鎮之進拜榮祿大夫江浙等處行中書省平章政事有旨命中書祖道都門外以餞之始至嚴飭左右毋預公家事且戒其掾屬曰僕從有私囑者慎勿聽若軍民諸事有關於利害者則言之當言而不言爾之責也言而不聽我之咎也聞者為之悚慄時朱清張瑄以海運之故致位叅知政事怙勢多行不法恐事覺以黃金五十兩珠三囊賂托克

托求蔽其罪托克托大怒繫之有司遣使奏聞帝喜曰
托克托我家老臣之子孫其志固宜與衆人殊賜內府
黃金五十兩命回使寵賚之有豪民白晝殺人托克托
立命有司按法誅之自是豪猾屏息民賴以安帝以浙
民相安之久未及召還大德十一年卒于位年四十四
子多爾濟別有傳

博爾濟

博爾濟阿爾拉氏始祖勃端察爾以才武雄朔方父諾

海阿爾斯蘭與烈祖神元皇帝接境敦睦隣好博爾濟志意沈雄善戰知兵太祖於潛邸共履艱危義均同氣征伐四出無往不從時諸部未寧博爾濟每警夜帝寢必安枕寓直於內語及政要或至達旦君臣之契猶魚水也初伊勒錦部卒盜牧馬博爾濟與往追之時年十三知衆寡不敵乃出奇從旁夾擊之盜舍所掠去及戰于和濟格爾兩軍相接下令殊死戰跬步勿退博爾濟繫馬於腰蹠而引滿分寸不離故處太祖嘉其勇膽又

嘗潰圍於奇味太祖失馬博爾濟擁帝累騎而馳頓止
中野會天雨雪失牙帳所在卧草澤中與穆呼哩張璁
裘蔽帝通夕植立足蹟不移及旦雪深數尺遂免於難
默爾奇斯之戰亦以風雪迷陣再入敵中求太祖不見
急趨輜重則帝已還卧憩車中聞博爾濟至曰此天贊
我也丙寅歲太祖即皇帝位君臣之分益密嘗從容謂
博爾濟及穆呼哩曰今國內平定多汝等之力我之與
汝猶車之有輓身之有臂汝等宜體此勿替遂以博爾

濟及穆呼哩為左右萬戶各以其屬翊衛位在諸將上
皇子察罕台出征西域有旨從博爾濟受教博爾濟教
以人生經涉險阻必獲善地所過無輕舍止太祖謂皇
子曰朕之教汝亦不踰是未幾賜廣平路戶一萬七千
三百有奇為分地以老病薨太祖痛悼之大德五年贈
推忠協謀佐運功臣太師開府儀同三司追封廣平王
謚武忠子博囉台襲爵萬戶贈推誠宣力保順功臣太
師開府儀同三司追封廣平王謚忠定孫伊實特穆爾

伊實特穆爾世祖時嘗寵以不名賜號伊魯勒諾延猶
華言能官也弱冠襲爵統阿勒台部器量宏達莫測其
際世祖聞其賢驛召赴闕見其風骨龐厚解御服銀貂
賜之時重大官內膳之選特命領其事侍宴內殿伊實
特穆爾起行酒詔諸王妃皆為答禮至元十二年拜御
史大夫時江南既定益封功臣後遂賜全州清湘縣戶
為分地具在中臺務振宏綱弗親細故興利之臣欲援
金舊制併憲司入漕府當政者又請以郡府之吏互照

憲司檢底伊實特穆爾曰風憲所以戢奸若是有傷監
臨之體其議乃沮遇事廷辯吐辭鯁直世祖每為之霽
威至元二十四年宗王納延叛東鄙世祖躬行天討命
總戎者先之世祖至半道伊實特穆爾已退敵僵尸覆
野數旬之間三戰三捷獲納延以獻詔選乘輿索駝百
蹄勞之謝曰天威所臨猶風偃草臣何力之有世祖還
留伊實特穆爾勸其餘黨乃執其酋金嘉努以獻戮其
同惡數人於軍前明年納延之遺孽哈坦多羅干復叛

再命出師兩與之遇皆敗之追及兩河其衆大敗遂遁
時已盛冬聲言俟春方進乃倍道兼行過黑龍江擣其
巢穴殺戮殆盡哈坦多羅干莫知所終夷其城撫其民
而還詔賜內府七寶冠帶以旌之加太傅開府儀同三
司中命禦邊杭愛二十九年加錄軍國重事知樞密院
事宗王帥臣咸稟命焉特賜步輦入內位望之重廷臣
無出其右三十年成宗以皇孫撫軍北邊伊實特穆爾
輔行請授皇孫以儲闡舊璽詔從之三十一年世祖崩

皇孫南還宗室諸王會于上都定策之際伊實特穆爾起謂晉王噶瑪拉曰宮車晏駕已踰三月神器不可久虛宗祧不可乏主疇昔儲闈符璽既有所歸王為宗盟之長奚俟而不言噶瑪拉遽曰皇孫踐阼願北面事之於是宗親大臣合辭勸進伊實特穆爾復坐曰大事已定吾死且無憾皇孫遂即位進秩太師賜以尚方玉帶寶服還鎮北邊元貞元年冬議邊事入朝兩宮賜宴如家人禮賜其妻圖古勒宴服及他珍寶十一月以疾薨

大德五年詔贈宣忠同德弼亮功臣依前太師開府儀同三司錄軍國重事御史大夫追封廣平王謚曰貞憲子三人穆哩庫仍襲爵為萬戶次托里次托克托呼為御史大夫

博囉罕

博囉罕學順民事太祖為第一千戶戰歿於敵子托歡襲職從憲宗四征不庭有拓地功子寶勒們鎮徼外從征六詔等城亦歿于兵子伊徹察喇性仁厚勤儉事母

以孝聞資貌英偉望之如神世祖雅聞其賢且聞其父之死年十六召見帝見其容止端重奏對詳明喜而謂曰實勒們有子矣即命領四集賽台官至元十七年長一集賽明年詔曰伊徹察喇秉心忠實執事敬慎知無不言言無不盡曉暢朝章言輒稱旨不可以其年少而弗陞其官可代錫津為宣徽使二十六年帝討叛者于杭愛衆皆陣伊徹察喇奏曰丞相安圖已延御史大夫伊魯勒皆已受命征戰三人者臣不可以後之今勅賊

逆命敢禦天戈惟陛下憐臣使臣一戰帝曰乃祖博囉罕佐我太祖無征不在無戰不克其功大矣卿以為安圖輩與爾家同功一體各立戰功自恥不逮然親屬索韃恭衛朝夕爾功非小何必身踐行伍手事斬馘乃快爾心耶二十七年僧格既立尚書省殺異已者箱天下口以刑爵為貸既而紀綱大紊尚書平章政事伊蘇岱爾太官屬也潛以其事白伊徹察喇請奏劾之僧格伏誅帝曰伊徹察喇口伐大姦發其蒙蔽乃以沒入僧格

黃金四百兩白金三千五百兩及水田水磴別墅賞其
清彊僧格既敗帝以湖廣行省西連番洞諸蠻南接交
趾島夷延袤數千里其間土沃人稠畬丁溪丁善驚好
鬪思得賢方伯往撫安之伊徹察喇舉哈喇哈斯達爾
罕以為行省平章政事凡八年威德交孚洽于海外入
為丞相天下稱賢世以伊徹察喇為知人二十八年都
水使者請鑿渠西導白浮諸水經都城中東入潞河則
江淮之舟既達廣濟渠可直泊於都城之匯帝亟欲其

成又不欲役其細民敕四集賽人及諸府人專其役度
其高深畫地分賦之刻日使畢工伊徹察喇率其屬著
役者服操畚鍤即所賦以倡趨者雲集依刻而渠成賜
名曰通惠河公私使之帝語近臣曰是渠非伊徹察喇
身率衆手成不速也成宗即位制曰伊徹察喇盡其誠
力深其謀議抒忠於國流惠於人可加開府儀同三司
太保錄軍國重事樞密宣徽使大德四年拜太師初叛
王海都都勒幹據金山南北不奉正朔垂五十年時入

為寇嘗命親王統左右部宗王諸帥屯列大軍備其衝
突五年朝議北師少怠紀律不嚴命伊徹察喇副晉王
督之是年海都都勒幹入寇大軍分為五隊伊徹察喇
將其一鋒既交頗不利伊徹察喇怒被甲持矛身先陷
陣一軍隨之出敵背五軍合擊大敗之海都都勒幹遁
去伊徹察喇亦罷兵歸鎮厥後都勒幹請臣附時武宗
亦在軍伊徹察喇遣使詣武宗及諸王將帥曰都勒幹
請降為我大利固當待命於上然往返再閱月必失事

機事機一失為國大患人命困於轉輸將士疲於討伐
無有已時矣都勒幹之妻我弟瑪古哈喇妹也宜遣使
報之許其臣附衆議皆以為允既遣始以事聞帝曰伊
徹察喇深識機宜既而瑪古哈喇復命由是叛人稍稍
來歸十年冬叛王穆爾特穆爾等屯于金山武宗帥師
出其不意先踰金山伊徹察喇以諸軍繼往壓之以威
啖之以利穆爾特穆爾乃降其部人驚潰伊徹察喇遣
圖們特穆爾察呼將萬人深入其部人亦降徹伯爾者

海都長子也海都死嗣領其衆至是掩取其部人凡兩部十餘萬口至大元年伊徹察喇遣使奏曰諸王托和木本懷搗貳而徹伯爾游兵近境叛黨素無悛心倘合謀致死則垂成之功顧為國患臣以為都勒幹先衆請和今雖死宜遣使安撫其子庫春使不我異又諸部既已來歸我之牧地不足宜處諸降人於金山之陽吾軍屯田金山之北軍食既饒又成重戍就彼有謀已擣其腹心矣奏入帝曰是謀甚善卿宜移軍阿達哈薩音薩

哈地伊徹察喇既移軍徹伯爾托和木果欲奔庫春不見納去留無所遂相率來降於是北邊始寧帝詔伊徹察喇曰卿之先世佐我祖宗常為大將攻城戰野功烈甚著卿乃國之元老宣忠底績靖謐中外朕入繼大統卿之謀猷居多今立和琳等處行中書省以卿為右丞相依前太師錄軍國重事特封淇陽王佩黃金印宗藩將領實瞻卿麾進退其益懋乃德悉乃心力毋替所服四年伊徹察喇入朝帝宴于大明殿眷禮優渥尋以疾

費于第詔贈宣忠安遠佐運弼亮功臣諡忠武

塔齊爾一名布展居官山伯祖父博囉罕從太祖起朔方直宿衛為和尼齊和尼齊者佩橐鞬侍左右者也由是子孫世其職博囉罕從太祖平諸國宣力為多當時與穆呼哩等俱以功號四傑塔齊爾其從孫也驍勇善戰幼直宿衛太祖平燕睿宗監國間燕京盜賊恣意殘殺直指富庶之家載運其物有司不能禁乃遣塔齊爾耶律楚材窮治其黨誅首惡十有六人由是巨盜屏迹

太宗伐金塔齊爾從師授行省兵馬都元帥分宿衛與諸王軍士俾統之下河東諸州郡濟河破潼關取陝路辛卯從圍河中府拔之壬辰從渡白坡時睿宗已自西和州入興元由武關出唐鄧太宗以睿宗與金兵相持久乃遣使約期會兵合進即詔發諸軍至鈞州連日大雪睿宗與金人戰于三峯山大破之詔塔齊爾等進圍汴城金主以兄子曹王額爾克為質太宗與睿宗還河北塔齊爾復與金兵戰于南薰門癸巳金主遷蔡州塔

齊爾復帥師圍蔡甲午滅金遂留鎮撫中原分兵屯大河之上以遏宋兵丙申破宋光息諸州事聞于朝以息州軍民一千戶賜之戊戌卒子必里克台嗣為和尼齊憲宗即位歲壬子襲父職總管四萬戶蒙古漢軍攻宋兩淮定邊地戊午會師圍宋襄陽逼樊城力戰死之次曰宋都木達至元七年賜金虎符襲蒙古軍萬戶八年悉兵再攻襄陽圍樊城進戰鄂岳漢陽江陵歸峽諸州皆有功十二年加昭毅大將軍受詔為隆興出征都元

帥與李恒等長驅而宋人莫當其鋒戰勝攻取望風迎
降盡平江西十一城又徇嶺南廣東宋亡還師未及論
功卒

元史卷一百十九

元史卷一百十九考證

穆呼哩傳北京十提控兵 十原文訛士據本紀改

攻拔吉隰州 吉原文訛石考地理志吉州與隰州屬
晉寧路石州則屬冀寧路此與隰州連文當從吉今
據改

博囉傳庫庫布哈 原文作課課不花他卷又作濶濶
不花今併改

巴圖爾 按史例均詳世系此名前傳未見本傳又未

詳何人之後考類編乃穆呼哩之孫博囉之子原史
未便增訂姑仍舊史

昭睿順聖皇后之姊也 姊原文作同母兄據安圖傳
改

伊實特穆爾傳皇孫踐阼 孫原文作帝本紀及類編
俱作孫按下文皇孫遂即位當作孫字為是今據改

欽定四庫全書

元史卷一百二十

明翰林學士亞中大夫知制誥兼修國史宋濂等修

列傳第七

察罕

伊將薩哈勒 喇勒智喇幹

察罕初名伊德唐古鄂摩克氏父吹辰類為夏臣其妾方懷察罕不容於嫡母以配掌羊羣者哲哩木察罕稍長其母以告且曰嫡母已有弟矣察罕武勇過人幼牧

羊於野植杖於地脫帽寘杖端跪拜歌舞太祖出獵見而問之察罕對曰獨行則帽在上而尊二人行則年長者尊今獨行故致敬於帽且聞有大官至先習禮儀耳帝異之乃挈以歸語光獻皇后曰今日出獵得佳兒可善視之命給事內廷及長賜姓蒙古妻以宮人鴻吉哩氏嘗行困脫靴藉草而寢鴉鳴其旁心惡之擲靴擊之有蛇自靴中墜歸以其事聞帝曰是禽人所惡者在爾則為喜神宜戒子孫勿殺其類從帝略雲中桑乾金將

達實擁重兵守野狐嶺帝遣察罕覘虛實還言彼馬足輕動不足畏也帝命鼓行而前遂破其軍圍白樓七日拔之以功為御帳前首千戶從帝征西域布哈爾賽瑪爾堪二城回回國主扎拉鼎拒守鐵門關兵不得進察罕先驅開道斬其將餘衆悉降又從攻西夏破肅州師次甘州察罕父吹辰類居守城中察罕因射書招之且求見其弟時弟年十三命登城於高處見之且遣使諭城中使早降其副恩楚等三十六人合謀殺吹辰類父

子并殺使者併力拒守城破太祖欲盡坑之察罕言百姓無辜止罪三十六人進攻靈州夏人以十萬衆赴援帝親與戰大敗之還次六盤夏主堅守中興帝遣察罕入城諭以禍福衆方議降會帝崩諸將擒夏主殺之復議屠中興察罕力諫止之馳入安集遺民太宗即位從略河南北還清水達蘭達巴之地賜馬三百珠衣金帶鞍勒皇子庫春胡土克圖伐宋命察罕為斥候又從親王昆布哈南伐歲乙未克棗陽及光化軍未幾召昆布

哈赴行在以全軍付察罕丁酉復與昆布哈率師進克
光州戊戌授馬步軍都元帥率諸翼軍攻拔天長縣及
滁壽泗等州定宗即位賜黑貂裘一鎗刀十命拓江淮
地憲宗即位召見累賜金五十兩珠衣一金綺二疋以
都元帥兼領尚書省事賜汴梁歸德河南懷孟曹濮太
原三千餘戶為食邑及諸處草地合一萬四千五百餘
頃戶二萬餘未幾復召賜金四百五十兩金綺弓矢等
物乙卯卒贈推忠開濟翊運功臣開府儀同三司上柱

國追封河南王諡武宣子十人長穆呼哩穆呼哩事憲宗直宿衛從攻釣魚山以功授四鄂爾多齊哩克昆千戶賜金幣及黃金鞍勒世祖即位賜金五十兩珠二串至元四年攻宋自江陵略地回至安陽灘宋兵扼其歸路穆呼哩奮擊敗之都元帥阿珠墜馬宋軍追及之穆呼哩挾之上馬鏖戰退宋兵由是得免特賜銀二百五十兩佩金虎符為蒙古軍萬戶復攻襄樊有功卒于軍贈推誠宣力功臣榮祿大夫平章政事柱國追封梁國

公諡武毅從孫伊埒薩哈勒

伊埒薩哈勒祖吹且佐太祖時得召見屬皇子察哈台
為扎爾古齊父阿卜呼事諸王阿勒呼木居西域至元
十年擇貴族子備宿衛召伊埒薩哈勒至為舒庫爾齊
掌服御事甚見親幸有大政時以訪之稱之曰秀才而
不名奉使河西還奏諸王哲伯特穆爾用官太濫帝嘉
之擢河東提刑按察使逐平陽路達嚕噶齊台哈布哈
召還賜黃金百兩銀五百兩以旌其直進南臺中丞帝

出內中寶刀賜之曰以鎮外臺時丞相阿哈瑪特之子
呼遜為江淮行省平章恃勢貪穢伊埒薩哈勒發其姦
得贓鈔八十一萬錠奏而誅之并劾江淮釋教總攝嘉
木揚喇勒智諸不法事諸道竦動二十一年改北京宣
慰使諸王納延鎮遼東伊埒薩哈勒察其必反密請備
之二十三年罷宣慰司立遼陽行省以伊埒薩哈勒為
叅知政事已而納延果反帝親征之時諸軍皆會伊埒
薩哈勒掌運糧儲軍供無乏東方平帝嘉其先見且餉

運有勞加左相二十七年命尚諸王算濟女親為資裝
以送之併贈玉帶一改四川行省左丞二十九年再賜
玉帶一元貞元年成宗即位入朝卒弟喇勒智喇幹

喇勒智喇幹為裕宗東宮筆且齊至元十八年蜀初定
帝閱其地久受兵百姓傷殘擇近臣撫安之以喇勒智
喇幹為嘉定路達魯噶齊時方以關田均賦洱盜息訟
諸事課守令喇勒智喇幹奉詔甚謹民安之使者交薦
其能會盜起雲南號數十萬聲言欲寇成都喇勒智喇

幹馳入告急言辭懇切繼以泣涕大臣疑其不然帝曰
雲南朕所經理未可忽也推食勞之又語喇勒智喇幹
曰南人生長亂離豈不厭兵畏禍耶御之乖方保之不
以其道故為亂耳其歸以朕意告諸將叛則討之服則
捨之母多殺以傷生意則人定矣喇勒智喇幹至蜀宣
布上旨俄召為泉府卿後遷刑部尚書有小吏誣告漕
臣劉獻盜倉粟宰相僧格方事聚斂衆阿其意鍛煉枉
服喇勒智喇幹曰刑部天下持平輦轂之下漕臣以冤

死何以正四方乎即以實聞以是忤丞相出為江東道
宣慰使在官務興學諸生有俊秀者拔而用之為政嚴
明豪民猾吏縮手不敢犯然亦無所刑戮而治元貞二
年遷四川行省叅知政事蜀有婦人殺夫者繫數十人
加以箠楚卒不得其實喇勒智喇幹至盡按得之大德
三年以叅知政事為湖南宣慰使繼改荆湖荆湖多弊
政而公田為甚部內實無田隨民所輸租取之戶無大
小皆出租雖水旱亦不免喇勒智喇幹問民所不便凡

十數事上於朝而言公田尤切朝議遣使理之會有詔
凡官無公田者始隨俸給之民力少蘇七年再遷四川
行省叅知政事八年進左丞雲南王入朝所在以驛騎
縱獵喇勒智喇幹曰驛騎所以傳命令事非有急且不
得馳況獵乎王憚為之止蜀人饑親勸分以賑之所活
甚衆有死無葬者則以已錢買地使葬且修寬政以撫
其民部內以治十年入朝帝以白金對衣賜之加資德
大夫湖廣行省左丞湖廣歲織幣上供以省臣領工作

遣使買絲他郡多為奸利工官又為刻剥故匠戶日貧
造幣益惡喇勒智喇幹不遣使令工視賈有藏絲者擇
買之工不告病歲省費數萬貫他郡推用之皆便至大
三年以疾卒於官年五十七初贈資德大夫陝西行省
右丞上護軍寧夏郡公諡忠惠再贈推誠亮節崇德贊
治功臣榮祿大夫中書平章政事柱國秦國公子二人
長瑪南翰林學士承旨次韓吉納御史大夫孫達爾瑪
內府宰相

徹伯爾和卓

徹伯爾和卓賽音人賽音西域部之族長也因以為氏
和卓其官稱也徹伯爾長身美髯方瞳廣顙雄勇善騎
射初謁太祖于軍中一見異之太祖與克呼王汗有隙
一夕王汗潛兵來倉卒不為備衆軍大潰太祖遽引去
從行者僅十九人徹伯爾與馬至班朱爾河餼糧俱盡
荒遠無所得食會一野馬北來諸王哈扎爾射之殪遂
剗革為釜出火于石汲河水煮而啖之太祖舉手仰天

而誓曰使我克定大業當與諸人同甘苦苟渝此言有
如河水將士莫不感泣王汗既滅西域諸部次第亦平
乃遣徹伯爾使金金不為禮而歸金人恃居庸之塞冶
鐵錮關門布鐵蒺藜百餘里守以精銳徹伯爾既還報
太祖遂進師距關百里不能前召徹伯爾問計對曰從
此而北黑樹林中有間道騎行可一人臣向嘗過之若
勒兵銜枚以出終夕可至太祖乃令徹伯爾輕騎前導
日暮入谷黎明諸軍已在平地疾趨南口金鼓之聲若

自天下金人猶睡未知也此驚起已莫能支吾鋒鏑所及流血被野闕既破中都大震已而金人遷汴太祖覽中都山川形勢顧謂左右近臣曰朕之所以至此者徹伯爾之功為多又謂徹伯爾曰汝引弓射之隨箭所落悉畀汝為已地乘輿北歸留徹伯爾與諸將守中都授黃河以北鐵門以南天下都達魯噶齊賜養老一百戶并四王府為居第徹伯爾每戰被重甲舞槊陷陣馳突如飛嘗乘素駝以戰衆莫能當有丘真人者有道之士

也隱居崑崙山中太祖聞其名命徹伯爾往聘之丘語
徹伯爾曰我嘗識公徹伯爾曰我亦嘗見真人他日偶
坐問徹伯爾曰公欲極一身貴顯乎欲子孫蕃衍乎徹
伯爾曰百歲之後富貴何在子孫無恙以承宗祀足矣
丘曰聞命以後果如所願云卒年一百一十八贈推忠
佐命功臣太傅開府儀同三司上柱國追封涼國公諡
武定二子阿里哈密拉齊阿里哈蚤從徹伯爾出入行
陣勇而善謀憲宗伐蜀為天下質子兵馬都元帥生哈

濟終湖南宣慰使贈推誠保德功臣金紫光祿大夫司徒追封涼國公諡安惠生陝西行省平章政事楊阿太府監丞阿爾斯蘭太僕寺丞本布楊阿生阿巴齊太僕寺卿密拉齊贈開府儀同三司上柱國追封涼國公諡懿生戶部尚書額伯爾心陝西行省叅知政事哈喇

卓沁台

卓沁台鄂爾和達氏其先琳沁巴丹以材武雄諸部生子曰鄂爾和達曰莽果與扎拉爾鴻吉哩伊奇喇斯等

五人當開創之先協贊大業厥後太祖即位命其子孫各因其名為氏號五投下朔方既定舉六十五人為千夫長鄂爾和達之孫曰卓沁台其一也卓沁台有膽略善騎射勇冠一時初奇味王汗之子星根有智勇諸部畏之奇雅喇哈喇克心沙陀等帥衆來侵兵戰不利近臣和斯音德爾等馳告太祖曰事急矣羣下忠勇無踰卓沁台者宜急遣之拒敵從之卓沁台承命單騎陷陣射殺星根降其大將實勒們等遂併有奇味之地奈曼

然爾格台合兵來侵諸部有陰附之者不虞太祖領兵卒至諸部潰去乘勝敗之卓沁台俘其主嘉克堅布及二女以歸諸部悉平與嘉克堅布盟而歸之未幾奈曼復叛卓沁台以計襲嘉克堅布殺之遂平其國卓沁台始從征奇雅喇自哈密啓行歷班沁海子間闕萬里每遇戰陣必為先鋒帝嘗諭之曰朕之望汝如高山前日影也賜嬪御茂巴噶必濟音濟薩巴俾統烏嚕古四千人世世無替子奇塔特材武過人自太宗及世祖歷事

四朝以勞封德清郡王賜以金印丙申賜德州戶二萬
為食邑至元十八年增食邑二萬一千戶肇慶路連州
德州洎屬邑俱隸焉竒塔特薨子都沁巴圖爾襲爵為
郡王太宗時與伊拉噶台戰勝帝即以伊拉噶台妻賜
之世祖之征額呼布格也竒塔特子哈達與呼圖克疏
而請曰臣父祖幸在先朝當軍旅征伐之寄屢立戰功
今王師北征臣等幸少壯願如父祖力戰自効既得請
戰于寶默溫都爾之地諸王哈坦駙馬琳沁與烏蘭孟

古居右諸王塔齊爾及達爾楚克台居左哈必齊將中
軍兵始交獲其將哈坦斬之威喇之軍遂敗衄又戰于
實喇雅圖噶之地當帝前混戰至日晡勝之帝賜以黃
金將佐吏卒行賞各有差李壇叛帝遣哈必齊及阿爾
班哈達庫庫楚往討之哈達與烏魯訥呼台亦在行壇
平與有功焉哈達子托歡亦嘗從諸王齊齊克圖討珠
爾噶台獲之又嘗破錫里濟永和爾于伊蘇摩哩及征
納延托歡弟慶通亦在軍雖病猶力戰奇塔特二子曰

都沁曰哈達哈達三子曰托歡曰琳沁巴勒曰慶通托
歡二子曰達實特穆爾曰多喇達實特穆爾一子曰實
喇布哈自奇塔特而下凡九人皆封郡王云

扎哈

扎哈齊哩克台氏以軍伍長從太祖同飲班朱爾河水
與諸王百官大會鄂諾河上太祖尊號曰青吉斯皇帝
歲庚午從征奈曼有功賜良馬一壬申從攻庫楚克諸
國復賜珍珠旗佩金虎符為錫里巴從攻塔塔爾欽察

唐古哲袞契丹女直河西諸國所俘生口萬計悉以上
獻賜御用服器白金等物命屯田於阿嚙罕立扎哈城
戍守之壬申從太祖謀定漢地師次隆興與金將呼齊
呼戰矢中臆間累瘡而出者復數四軍聲為之大振既
破燕太祖命於城中環射四箭凡箭所至園池邸舍之
處悉以賜之尋拜中書右丞相己丑太宗即位扈從至
西京攻河中河南鈞州癸巳攻蔡州以功賜恩州一千
戶先是收天下童男童女及工匠置局弘州既而得西

域織金綺紋工三百餘戶及汴京織毛褐工三百戶皆分隸弘州命扎哈世掌焉定宗即位以扎哈為先朝舊臣仍拜中書右丞相薨年八十四子十人博果斯繼食其封邑從世祖征花馬大理率兵千人結浮橋于金沙江以濟師中統初論功授益州等路宣撫使賜金虎符玉帶二年改東平路副達魯噶齊討平叛寇尋遷濟南等路宣慰至元二年遷南京路達魯噶齊四年討平蘄縣叛民以病乞謝事特授保定路達魯噶齊賜錢一萬

貫歸老于家卒年八十一

實納台

實納台圖伯特克呼氏侍太祖以忠勇聞時穆呼哩博爾濟既立為左右萬戶帝謂實納台曰汝願屬誰麾下為我宣力對曰願屬穆呼哩即日命佩金符領蒙古軍從太師國王為先鋒兵至河北史天澤之父率老幼數千詣軍門降國王承制授天澤兄天倪河北西路都元帥領真定乙酉天澤送母還白霄副帥武僊殺天倪以

真定叛經歷王縉追天澤至燕請攝主帥遣監軍李伯
祐詣國王軍前言狀且請援兵國王命實訥台率精甲
三千與天澤合兵進圍中山僊遣其將葛鐵槍來援實
訥台撤圍迎之遇諸新樂奮擊敗之會日暮阻水為營
實訥台料其氣索必宵遁乘勝復進擊大敗之擒鐵槍
中山守將亦宵遁遂克中山取無極拔趙州僊棄真定
奔西山抱犢寨實訥台與天澤入城撫定其民未幾僊
潛結水軍為內應夜開南門納僊復據其城實訥台倉

卒以步兵七十踰城奔藁城。遲明部曲稍來，集兵威復振。襲取真定，僊棄城遁。將士怨民之反覆，驅萬人出將屠之。實訥台曰：「金氏慕國威信，徯我來蘇。此民為賊所驅，脇有何罪焉？若不勝一朝之忿，非惟自屈其力，且堅他城不降之心。乃皆釋之初僊之叛也。」其弟質國王軍中聞之，遁去。實訥台遣弟賽罕追及於紫荆關，斬之。俘其妻子而還，乃整兵前進。下太原，略太行，拔長勝寨，斬僊守將盧治中。圍僊於雙門寨。僊遁去，引兵出太行山。

東遇宋將彭義斌與戰敗之追至火炭山破其營擒義斌斬之至大名守將蘇元帥以城降遂引兵臨東平敗安撫王立剛于陽穀圍東平立剛走連水金守將棄城遁他將邀擊敗之遂定東平又與蒙古布哈徇河北懷孟衛從國王定益都壬辰渡河略汴京徇睢州遇金將完顏慶善努與戰敗之追斬慶善努金主入蔡諸軍圍之實訥台史天澤攻城北面汝水阻其前結筏潛渡血戰連日金亡朝廷以實訥台功多命併將史氏三萬戶

軍以圖南征賜東平戶三百俾食其賦命嚴實為治第宅分撥牧馬草地日膳供二羊及衣糧等以老病卒于東平歸葬漠北子七人瑪古岱爾烏爾圖知名

瑪古岱爾歲戊戌從國王和爾齊行省于襄陽略地兩淮已未從渡江攻鄂州以功賞銀五十兩中統元年追阿勒達爾琿塔哈有功二年從北征敗額呼布格於實默溫都爾之地三年又與李璫戰有功國王和爾齊上其功奉旨賞銀五十兩授提舉本投下諸色匠戶達魯

噶齊卒子四人和尼齊江南行臺御史大夫

烏爾圖中統三年從石高山奉旨拘集特默齊軍授本
軍千戶至元八年授武略將軍佩銀符十年攻樊城有
功換金符遷武德將軍十一年渡江有功賞銀三百兩
改武節將軍十二年四月至建安卒于軍子托羅該徹
爾襲職從參政阿嚙罕攻獨松關有功陞宣武將軍尋
命管領侍衛軍樞密院錄其渡江以來累次戰功十八
年陞懷遠大將軍二十年江西行省命討武寧叛賊董

琦平之改授虎符江州萬戶府達魯噶齊二十四年移鎮潮州值賊張文惠羅半天等嘯聚江西行樞密院檄討之領兵破賊寨斬賊首羅大老李尊長等獲其偽銀印三卒于軍

烏頁爾

烏頁爾沙卜珠氏狀貌甚偉腰大十圍父圖魯噶克察以武勇稱太祖五年烏頁爾與珠卜納延克金東京有功九年太師穆呼哩取北京領兵為先驅下之捷聞授

金紫光祿大夫北京總管都元帥留撫其人綏懷有方
自京以南相繼來降時金將達魯以惠州漁河口為隘
有衆數萬圖復北疆烏頁爾以銳兵千人擊摧其鋒殺
數千人獲其旗鼓羊馬斬達魯於軍中有趙守玉者據
興州烏頁爾討平之十一年張致以錦州叛又攻破之
穆呼哩大喜以馬十匹甲五事賞其功十二年興州監
軍綽爾以兵叛烏頁爾往征之賊軍射殺所乘馬軍士
憤怒奮戈衝擊大破賊軍十五年從征山東大戰東平

馳赴陷陣生挾二將以還穆呼哩壯之以功上聞十六年從征延安矢中右股力戰破之俄又取葭鄜二州擒金梟將張鐵槍以獻十七年克鳳翔及所屬州郡十八年從帝親征河西明年下之詔賜烏頁爾馬五匹甲一事二十年從穆呼哩圍益都越二年下三十餘城太宗元年入覲命與薩里台和爾齊征遼東下之三年又與薩里台征高麗下受開龍宣泰葭等十餘城高麗懼請和烏頁爾曰若能以子為質當即休兵十三年遣其族

子醇從烏頁爾來朝帝大悅厚加賜予俾充北京東京
廣寧蓋州平州泰州開元府七路征行兵馬都元帥佩
虎符憲宗元年召問東夷事對曰臣雖老倘藉威靈指
麾三軍敵國猶可克況東夷小醜乎帝壯其言問飲酒
幾何對曰唯所賜時有一駙馬都尉在側素以酒稱命
與之角飲帝大咲賜錦衣名馬俄謝病歸七年復來朝
帝憫其老謂曰自太祖時效勞至今者獨卿無愆賜賚
甚厚以都元帥授其中子阿哈八年秋九月辛亥夜中

星隕帳前光數丈有聲烏頁爾曰吾死矣明日卒年九十六子四人轄哩最有名太宗時授北京等路達魯噶齊至元七年改授招勇大將軍河間總管

和斯摩哩

和斯摩哩西域古則鄂爾多人初為西遼庫爾汗近侍後為古則鄂爾多屬喀三拜薩哈勒長官太祖西征和斯摩哩率喀三等城酋長迎降大將哲伯以聞帝命和斯摩哩從哲伯為先鋒攻奈曼克之斬其主庫楚類哲

伯令和斯摩哩持庫楚類首往徇其地若喀什噶爾葉爾羌鄂端諸城皆望風降附又從征尼沙布爾城諭下之帝親征至賽瑪爾堪與其主扎拉鼎合戰于卓勒新濟齊之地敗之追襲扎拉鼎等於阿爾噶城戰于圖滿山又敗之追至汗顏城西寨又敗之扎拉鼎逃入于海和斯摩哩收其珍寶以還取伊嚕格勤德心兩城繼而汗顏城亦下帝遣使趣哲伯疾馳以討欽察命和斯摩哩招諭奇爾台實喇烏蘇等城悉降至庫爾哲部及阿

克蘇部以兵拒敵皆戰敗而降又招降赫林城進擊俄羅斯於塔勒山克之獲其國主密濟特薩勒哲伯命和斯摩哩獻諸卓沁太子誅之尋征喀喇至伯資巴里城與其主呼圖克薩哈勒戰又敗其軍遂平欽察軍還哲伯卒會帝親征河西和斯摩哩持所獲珍寶及七寶織迎見于阿魯斯布魯斯帝顧羣臣曰哲伯常稱和斯摩哩之功其軀幹雖小而聲聞甚大就以所進金寶命隨其力所勝悉賜之仍命與色辰額呼為筆且齊未幾和

斯摩哩奏向者嘗招安圖士卒留伊伯格勒城宜令扈
從征河西許之命常居左右至伊勒吉哈雅又討平實
達爾烏克從太祖征汴至懷孟令領鄂囉事帝由白坡
渡河會睿宗兵攻金將哈達敗之回駐金蓮川壬辰授
懷孟達嚕噶齊佩金符癸巳金將強元帥圍懷州和斯
哩率其衆及賈剌濟蘇蘇爾噶勒等力戰金兵退又遣
富察哈納赫舍哩北魯招諭金總帥范真率其麾下軍
民萬餘人來降己亥六月帝以和斯摩哩從軍西域宣

力居多命其長子諾綽巴襲為懷孟達嚕噶齊次子穆爾齊襲必且齊令和斯摩哩為扎爾古齊歸西域大師察罕行省特們德爾奏留之帝允其請庚子進懷孟河南二十八處都達嚕噶齊所隸州郡不從命者制令籍其家乙卯五月卒子穆里濟復為懷孟達嚕噶齊中統三年從攻淮西與宋戰死

元史卷一百二十

元史卷一百二十考證

伊埒薩哈勒傳江淮行省平章政事 原文作江浙行

省按百官志江淮行省設於至元十三年至二十二年始改江浙行省本紀呼遜被誅乃十九年事書江浙行省未考今據改

卓沁台傳與伊拉噶台戰勝 原文作亦刺哈台他卷又作亦刺哈係脫字今併改

扎哈傳歲庚午從太祖征奈曼有功 按續通鑑載太

祖元年丙寅滅奈曼此後不復紀奈曼事此作庚午
與諸書不合

壬申從攻庫楚克諸國 壬申從太祖謀定漢地 壬

申兩見核之本紀後壬申無訛考是年不載攻庫楚
克事疑尚在壬申已前但他書無可訂正仍闕疑

烏頁爾傳十六年從征延安力戰破之俄又取葭廊二
州 按太祖紀十六年穆呼哩克葭綏德保安廊坊
丹等州進攻延安不下是攻延安在取葭廊二州後

傳序次與穆呼哩傳同而與紀不合復云力戰勝之
未知所據

擒金梟將張鐵槍以獻

張原文作金據穆呼哩傳改

二十年從穆呼哩圍益都

按太祖紀穆呼哩於十八

年三月卒於解州續綱目同又按二十一年郡王岱

遜圍李全於益都十二月李全降如傳所云非特此

時穆呼哩已卒且是年亦無圍益都事自是紀載之

訛

遣其族子縛從烏貢爾來朝 原文脫族字據太祖本

紀增

欽定四庫全書

史部
元史卷一百二十一至
三

檢討_臣翁樹培覆勘

總校官編修_臣朱鈴

欽定四庫全書

元史卷一百一十一

明翰林學士亞中大夫知制誥兼修國史宋濂等修

列傳第八

蘇布特

蘇布特蒙古烏梁海人其先世獵於鄂諾河上遇敗巴
該皇帝因相結納至太祖時已五世矣諾爾布者生布
古圖衆目為哲勒默哲勒默者漢言有謀略人也三世

孫和實衮生喀巴喀巴二子長哈勒琿次蘇布特俱驍
勇善騎射太祖在班珠爾河時喀巴嘗驅羣羊以進遇
盜被執哈勒琿與蘇布特繼至以槍刺之人馬皆倒餘
黨逸去遂免父難羊得達於行在所哈勒琿以百戶從
帝與奈曼部主戰於長城之南哈勒琿射却之其衆奔
庫楚坦山而潰蘇布特以質子事帝為百戶歲辛未攻
金桓州先登拔其城帝命賜金帛一車默爾奇斯部強
盛不附丙子帝會諸將於圖喇河之黑林問誰能為我

征默爾奇斯者蘇布特請行帝許之乃選裨將阿勒楚爾領百人先覘其虛實蘇布特繼進蘇布特戒阿勒楚爾曰汝止宿必載嬰兒具以行去則遺之若挈家而逃者默爾奇斯見之果以為逃者遂不為備己卯大軍至蟾河與默爾奇斯遇一戰而獲二將盡降其衆其部主輝圖奔欽察蘇布特追之與欽察戰于玉峪敗之壬午帝征回回國其主默呼委國而去命蘇布特與哲伯追之及于呼喇河哲伯戰不利蘇布特駐河東戒其衆人

燕三炬以張軍勢其王夜遁復命統兵萬人由布哈川
布勒噶爾城追之凡所經歷皆無水之地既度川先發
千人為游騎繼以大軍晝夜兼行比至默呼逃入海不
月餘病死盡獲其所棄珍寶以獻帝曰蘇布特枕干血
戰為我家宣勞朕甚嘉之賜以大珠銀罌癸未蘇布特
上奏請討欽察許之遂引兵繞衮騰吉斯海展轉至太
和嶺鑿石開道出其不意至則遇其酋長伊勒吉及塔
塔古爾方聚於布咱河縱兵奮擊其衆潰走矢及伊勒

吉之子逃於林間其奴來告而執之餘衆悉降遂收其境又至阿勒錦河與俄羅斯大小穆爾奇扎爾遇一戰降之略阿蘇部而還欽察之奴來告其主者蘇布特縱為民還以聞帝曰奴不忠其主肯忠他人乎遂戮之又奏以默爾奇斯奈曼奇味杭津欽察諸部千戶通立一軍從之略伊瑪里克和卓部獲馬萬匹以獻帝欲征河西以蘇布特在外久遣令歸省其親蘇布特奏願從西征帝命度大磧以往丙戌攻下薩里輝和爾塔勒齊木

等部及德順鎮戎蘭會洮河諸州得牝馬五千匹悉獻于朝丁亥聞太祖崩乃還己丑太宗即位以塔瑪噶公主妻之從攻潼關軍失利帝責之睿宗時在藩邸言兵家勝負不常請令立功自效遂命引兵從睿宗經理河南道出牛頭關遇金將哈達帥行騎數十萬待戰睿宗問以方略蘇布特曰城居之人不耐勞苦數挑以勞之戰乃可勝也師集三峰山金兵圍之數匝會風雪大作其士卒僵仆師乘之殺戮殆盡自是金軍不能復振壬

辰夏睿宗還駐官山留蘇布特統諸道兵圍汴癸巳金主渡河北走追敗之於黃龍岡斬首萬餘級金主復南走歸德府未幾復走蔡州汴降俘其后妃及寶器以獻進圍蔡州甲午蔡州破金主自焚死時汴梁受兵日久歲饑人相食蘇布特下令縱其民北渡以就食乙未太宗命諸王巴圖西征巴齊瑪克曰聞巴齊瑪克有膽勇蘇布特膽勇可勝之命為先鋒與巴齊瑪克戰繼又令統大軍遂虜巴齊瑪克妻子於袞騰吉斯海巴齊瑪克

聞蘇布特至大懼逃入海中辛丑太宗命諸王巴圖等討俄羅斯部主額勒本為其所敗圍托里實克城不克巴圖奏遣蘇布特督戰蘇布特選哈必齊軍齊哩克昆等五十人一戰獲額勒本進攻托里實克城三日克之盡取俄羅斯所部而還經哈扎爾山攻滿濟勒噶部主齊哩克蘇布特為先鋒與諸王巴圖錫里庫實保哈坦五道分進衆曰齊哩克軍勢盛未可輕進蘇布特出奇計誘之至遼寧河諸王軍于上流水淺馬可涉中復有

橋下流水深蘇布特欲結棧潛渡繞出敵後未渡諸王
先涉河與戰巴圖軍爭橋反為所乘沒甲士三十人并
亡其麾下將巴哈台既渡諸王以敵尚衆欲要蘇布特
還徐圖之蘇布特曰王欲歸自歸我不至塔納河瑪察
克城不還也乃馳至瑪察克諸王亦至遂拔城而還諸
王來會巴圖曰遡寧河戰時蘇布特救遲殺我已哈台
蘇布特曰諸王惟知上流水淺且有橋遂渡而與戰不
知我於下流結棧未成今但言我遲當思其故於是巴

圖亦悟後大會飲以馬乳及蒲萄酒言征齊哩克時事
曰當時所獲蘇布特功也是歲太宗崩癸卯諸王大會
巴圖欲不往蘇布特曰大王於族屬為兄安得不往甲
辰遂會於伊奇哩河丙午定宗即位既朝會還家于圖
喇河上戊申卒年七十三贈效忠宣力佐命功臣開府
儀同三司上柱國追封河南王謚忠定子烏蘭哈達
烏蘭哈達初事太祖時憲宗為皇孫尚幼以烏蘭哈達
世為功臣家使護育之憲宗在潛邸遂分掌宿衛歲癸

已領兵從定宗征大真國破萬弩於遼東繼從諸王巴圖征欽察及俄羅斯博羅爾諸部丙午又從巴圖討博羅爾納琳穆蘇部平之戊申定宗崩巴圖與宗室大臣議立憲宗事久未決四月諸王大會定宗皇后問所宜立皆惶惑莫敢對烏蘭哈達對曰此議已先定矣不可復變巴圖曰烏蘭哈達言是也議遂定憲宗即位之明年世祖以皇弟總兵討西南夷烏蠻白蠻鬼蠻諸國以烏蘭哈達總督軍事其鬼蠻即赤禿哥國也癸丑秋大

軍自旦當嶺入雲南境摩步二部酋長唆火脫因塔裏
馬來迎降遂至金沙江烏蘭哈達分兵入察罕章蓋白
蠻也所在寨柵以次攻下之獨阿塔刺所居半空和寨
依山枕江牢不可拔使人覘之言當先絕其汲道烏蘭
哈達率精銳立砲攻之阿塔刺遣人來拒烏蘭哈達遣
其子阿珠迎擊之寨兵退走遂并其弟阿叔城俱拔之
進師取龍首關翊世祖入大理國城甲寅秋復分兵取
附都善闡轉攻合刺章水城屠之合刺章蓋烏蠻也前

次羅部府大酋高昇集諸部兵拒戰大破之於漢可浪山下遂進至烏蠻所都押赤城城際滇池三面皆水既險且堅選驍勇以砲摧其北門縱火攻之皆不克乃大震鼓鉦進而作作而止使不知所為如是者七日伺其困乏夜五鼓遣其子阿珠潛師躍入亂斫之遂大潰至昆澤擒其國王段智興及其渠帥馬合刺昔以獻其餘衆依阻山谷者分命裨將伊埒圖卜新掩其右哈達護尉掩其左約三日捲而內向及圍合與阿珠引善射者

二百騎期以三日四面進擊烏蘭哈達陷陣鏖戰又攻
織寨拔之至乾德哥城烏蘭哈達病委軍事於阿珠環
城立砲以草填塹衆軍始集阿珠已率所部搏戰城上
城遂破乙卯攻不花合因阿合阿因等城阿珠先登取
其三城又攻赤禿哥山寨阿珠緣嶺而戰遂拔之乘勝
擊破魯廝國塔渾城又攻取忽蘭城魯廝國大懼請降
阿伯國有兵四萬不降阿珠攻之入其城舉國請降復
攻阿魯山寨進攻阿魯城克之乃搜捕未降者遇赤禿

哥軍於合打台山追赴臨崖盡殺之自出師至此凡二
年平大理五城八府四郡洎烏白等蠻三十七部兵威
所加無不款附丙辰征白蠻國波麗國阿珠生擒其驍
將獻俘闕下詔以便宜取道與特古勒德爾兵合遂出烏
蒙趨瀘江剗禿刺蠻三城却宋將張都統兵三萬奪其
船二百艘於馬湖江斬獲不可勝計遂通道於嘉定重
慶抵合州濟蜀江與特古勒德爾會丁巳以雲南平遣使
獻捷於朝且請依漢故事以西南夷悉為郡縣從之賜

其軍銀五千兩綵幣二萬四千匹授銀印加大元帥還鎮大理遂經六盤山至臨洮府與大營合月餘復西征烏蠻秋九月遣使招降交趾不報冬十月進兵壓境其國主陳日暋隔江列象騎步卒甚盛烏蘭哈達分軍為三隊濟江齊齊克圖從下流先濟大帥居中駙馬輝圖與阿珠在後仍授齊齊克圖方略曰軍既濟勿與之戰彼必來逆駙馬斷其後汝伺便奪其船蠻潰走至江無船必為我擒矣師既登岸即縱與戰齊齊克圖違命蠻

雖大敗得駕舟逸去烏蘭哈達怒曰先鋒違我節度軍有常刑齊齊克圖懼飲藥死烏蘭哈達入交趾為久駐計軍令嚴肅秋毫無犯越七日日昃請內附於是置酒大饗軍士還軍柙赤城戊午引兵入宋境其地炎瘴軍士皆病遇敵少却亡軍士四人阿珠還戰擒其卒十二人其援復至阿珠以三十騎阿穆爾圖繼以五十騎擊走之時烏蘭哈達病將旋師阿珠戰馬五十疋夜為禿刺蠻所掠入告烏蘭哈達曰吾馬盡為盜掠去將何以

行即分軍搜訪知有三寨藏馬山顛阿珠親率將士攀崖而上破其諸寨生擒賊酋盡得前後所盜馬千七百疋乃屠柙赤城憲宗遣使諭旨約明年正月會軍長沙乃率四王騎兵三千蠻獠萬人破橫山寨闢老蒼關狗宋內地宋陳兵六萬以俟遣阿珠與四王潛自間道衝其中堅大敗之盡殺其衆乘勝擊逐蹙貴州蹂象州入靜江府連破辰沅二州直抵潭州城下潭州出兵二十萬斷我歸路烏蘭哈達遣阿珠與塔納伊嚕音特穆爾

軍其前而自與四王軍其後夾擊破之自入敵境轉鬪
千里未嘗敗北大小十三戰殺宋兵四十餘萬擒其將
大小三人其州又遣兵來攻追至門濠掩溺殆盡乃不
敢復出壁城下月餘時世祖已渡江駐鄂州遣伊埒蒙
古領兵二千人來援且加勞問遂自鄂州之蕲黃洲北
渡與大軍合庚申世祖即位夏四月烏蘭哈達至上都
後十二年卒年七十二子阿珠自有傳

阿勒楚爾

阿勒楚爾永古特氏其先居雲中父達袞為金羣牧使
歲辛未驅所牧馬來歸太祖命仍其官阿勒楚爾幼鞠
于外祖兆齋家訛言為趙家因姓趙氏年十四隸皇子
察罕台部嘗從獵射獲數麋有二虎突出射之皆死由
是以善射名皇子深器愛之己卯太祖西征塔實于阿
里瑪圖等國以功為千戶丁亥從征積石州先登拔其
城圍河州斬首四十級破臨洮攻德順斬首百餘級攻
鞏昌駐兵秦州太宗立尊察罕台為皇兄以阿勒楚爾

為元帥戊子鎮刪丹州自燉煌置驛抵玉關通西域從
定闕隴辛卯從圍鳳翔阿勒楚爾分兵攻西南隅城上
礮石亂下選死士先登拔之斬金將劉興格分兵攻西
和州宋將彊俊衆數萬堅壁清野以老我師阿勒楚爾
率死士罵城下挑戰俊怒悉衆出阿勒楚爾佯走俊追
之因以奇兵奪其城伏兵要其歸轉戰數十里斬首數
千級擒俊餘衆退保仇池進擊拔之徙拔平涼慶陽邠
原寧皆降涇州復叛殺守將郭元恕衆議屠之阿勒楚

爾但誅首惡師還原州降民棄老幼走衆曰此必反也
宜誅之以警其餘阿勒楚爾曰此輩懼吾驅之北徙耳
遣人諭之曰汝等若走以軍法治罪父母妻子併誅矣
汝歸保無他明年草青具牛酒迎師於此州民皆復歸
豪民陳苟集數千人潛新寨諸洞衆議以火攻之阿勒
楚爾曰招諭不出攻之未晚偕數騎抵寨縱馬解弓矢
召苟遙語折矢與為誓苟即相呼羅拜謝更生之恩皆
降金人守潼關攻之戰於扇車回不克睿宗由山南入

金境阿勒楚爾為先鋒趣散闊宋人已燒絕棧道復由
兩當縣出魚關軍沔州宋制置使桂如淵守興元阿勒
楚爾假道於如淵曰宋讐金久矣何不從我兵鋒一洗
國恥今欲假道南鄭由金洋達唐鄧會大兵以滅金豈
獨為吾之利亦宋之利也如淵度我軍歷境勢不徒還
遂遣人導我師由武休關東抵鄧州西破小關金人大
駭謂我軍自天而下其平章完顏哈達樞密使伊喇布
哈帥十七都尉兵數十萬相拒于鄧我師不與戰直趣

鈞州與親王阿齊台等兵合陣三峯山下會天大雪金兵成列阿勒楚爾率所部精兵迎擊於前諸軍乘之金師敗績癸巳金主奔蔡十二月從圍蔡甲午金亡初金將郭斌自鳳翔突圍出保金蘭定會四州至是命阿勒楚爾往取之圍斌于會州食盡將走敗之于城門兵入城巷戰死傷甚衆斌手劒驅妻子聚一室焚之已而自投火中有女奴自火中抱兒出泣授人曰將軍盡忠忍使絕嗣此其兒也幸哀而收之言畢復赴火死阿勒楚

爾命保其孤遂定四州金將汪世顯守鞏州皇子奎騰
圍之未下遣阿勒楚爾等往招之世顯率衆來降皇子
嘉其材勇賞賚甚厚賜名巴圖爾拜征行大元帥丙申
大軍伐蜀皇子出大散關分兵令宗王穆濟等出陰平
郡期會于成都阿勒楚爾領砲手兵為先鋒破宕昌略
階州攻文州守將劉祿數月不下謀知城中無井乃奪
其汲道率勇士梯城先登殺守陴者數十人遂拔其城
祿死之因招徠吐蕃酋長康托莽嘉等十族皆賜以銀

符略定龍州遂與大散軍合進克成都師還成都復叛
丁酉阿勒楚爾言於宗王曰隴西州縣方平人心猶二
漢陽當隴蜀之衝宋及吐蕃利於入寇宜得良將以鎮
之宗王曰安反側制寇賊上策也然無以易汝遂分蒙
古千戶五人隸麾下以往阿勒楚爾命侯和尚南戍沔
州之石門珠嚕西戍階州之兩水謹斥堠嚴巡邏西南
諸州不敢犯戊戌從元帥塔爾海率諸翼兵伐蜀克隆
慶己亥攻重慶庚子圍萬州宋人將舟師數百艘遡流

迎戰阿勒楚爾順流率勁兵乘巨筏浮草舟於其間矢
雨射宋人不能敵敗諸夔門辛丑伐西川破二十餘城
成都守將田顯開北門以納師宋制置使陳隆之出奔
追獲之縛至漢州令誘降守將王夔夔不降進兵攻之
夔夜驅火牛突圍出奔遂斬隆之壬寅會大軍破遂寧
瀘叙等州癸卯破資州庚戌阿勒楚爾安輯涇邈二州
宋制置余玠攻興元文州降將王德新乘隙自階州叛
執扈牛二鎮將領衆千餘走江油憲宗召阿勒楚爾還

舊鎮阿勒楚爾遣將擣江油奪扈牛歸中統元年世祖即位親王有異謀者其將阿勒達爾琿塔哈圖據關隴時阿勒楚爾以老委軍於其子帝遣宗王哈坦哈必齊阿哈瑪特西討阿勒楚爾曰內難方殷豈臣子安卧之時耶吾雖老尚能破賊遂引兵出刪丹之耀碑谷從阿哈瑪特與之合戰會大風晝晦戰至晡大敗之斬馘無算阿勒楚爾與總帥汪良臣斬阿勒達爾琿塔哈等捷聞帝錫璽書褒美賜弓矢錦衣四年卒年六十九延祐

元年贈推忠佐運功臣太保儀同三司上柱國封秦國公謚武宣子十人徹爾國寶最知名徹爾襲職為元帥丁巳從父攻瀘州降宋將劉整宋將姚德壁雲頂山戊午大軍圍之徹爾率部兵由水門先登破其壁德降後以病廢卒國寶一名赫色勒少擊劍學書個儻好義有謀畧父為元帥軍務悉以委之所至多捷從攻重慶降宋都統張實併掠合州以歸中統元年從攻阿勒達爾有功阿勒達爾叛將輝圖據吐蕃之達實嶺國寶攝帥

事討之衆欲速戰國寶曰此窮寇也宜少緩以計破之
遂以精兵襲其後輝圖欲西走國寶據險要之挑戰則
斂兵自固相持兩月潛兵出其不意擒殺之捷聞賜弓
矢金綺初阿勒楚爾告老制命徹爾襲征行元帥徹爾
以病不視事國寶乃謂諸弟曰昔我先人耀兵西陲大
功既集闕隴雖寧而西戎未靖此吾輩立功之秋也乃
遣謝鼎與弟國能持金帛說降吐蕃酋長康托莽嘉從
國寶入覲國寶奏曰文州山川險阨控庸蜀拒吐蕃宜

城文州屯兵鎮之從之授國寶三品印為蒙古漢軍元帥兼文州吐蕃萬戶府達魯噶齊與康托莽嘉皆賜金符時扶州諸羌未附國寶宣上威德於是科爾戩巴爾嘉諸酋長皆歸款從國寶入覲國寶圖山川形勢以獻詔授科爾戩巴爾嘉為萬戶賜金虎符諸酋長為千戶皆賜金符賜國寶金幣國寶治文州有善政至元四年卒延祐元年贈推誠佐理功臣光祿大夫平章政事柱國封梁國公謚忠定子世榮世延初國寶將卒以世榮

幼命弟國安襲其職國安既襲蒙古漢軍元帥兼文州吐蕃萬戶府達魯噶齊後以其兄國寶安邊功賜金虎符進昭勇大將軍十五年討叛王圖魯于六盤獲之請解職授世榮帝曰人爭而汝讓可以敦薄俗錄其六盤功進昭毅大將軍招討使世榮襲懷遠大將軍蒙古漢軍元帥兼文州吐蕃萬戶府達魯噶齊後以功進安遠大將軍吐蕃宣慰使議事都元帥佩三珠虎符世延中書平章政事

鄂約達勒

鄂約達勒莽果人其先琳沁巴圖爾有二子次名蒙果勒始別為莽果氏鄂約達勒其六世孫也與兄烏頁俱事太祖時代酬強盛烏頁率其屬歸之鄂約達勒止之不聽追之不肯還鄂約達勒乃還太祖曰汝兄既去汝獨留此何為鄂約達勒無以自明取矢折而誓曰所不終事主者有如此矢太祖察其誠更名為色辰約為諧達色辰者聰明之謂也諧達者左右輔翌之謂也太祖

與克哷王汗對陳於哈喇沁師少不敵帝命烏魯一軍
先發其將卓沁台橫鞭馬鬣不應鄂約達勒奮然曰我
猶鑿諸君猶斧鑿匪斧不入我請先入諸軍繼之萬一
不還有三黃頭兒在唯上念之遂先出陷陣大敗之至
晡時猶追逐不已敕使止之乃還腦中流矢創甚帝親
傳以善藥留處帳中月餘卒帝深惜之王汗減帝以其
將濟勒濟沙抗鄂約達勒乃分濟勒濟沙民百戶隸其
子且使世世歲賜不絕仍令收完莽果人民之散亡者

太宗思其功復以北方萬戶封其子孟克為郡王歲丙申呼圖克汰料漢民分城邑以封功臣授孟克秦安州民萬戶帝訝其少呼圖克對曰臣今差次惟視舊數多寡孟克舊纔八百戶帝曰不然鄂約達勒封戶雖少戰功多其增封為二萬戶與十功臣同為諸侯者封戶皆異其籍烏魯爭曰孟克舊兵不及臣之半今封顧多於臣帝曰汝忘而先橫鞭馬鬣時耶烏魯遂不敢言孟克卒孫珠爾噶岱奇塔特魯呼圖克烏納和囉噶齊俱

襲封為郡王

博爾歡

巴圖

博爾歡鄂約達勒幼子察木哈克孫蘇嚕克圖子也時諸侯王及十功臣各有斷事官博爾歡年十六為本部斷事官從世祖討額呼布格數有功帝喜而賜馬四十匹金幣稱之中統三年李璫叛命帥莽果一軍圍濟南分兵掠益都萊州悉平之詔錄燕南獄讞決明允賜衣一襲皇子雲南王和克齊為其省臣保赫鼎毒死事覺

中書擇可治其獄者四人奏上皆不稱旨丞相錫津以博爾歡聞帝可其奏博爾歡辭曰臣不敢愛死第年少不知書恐誤事耳帝乃以吏部尚書拜特穆爾輔其行未至雲南保赫昂密以金六籠迎餽祈勿究其事博爾歡慮其握兵徼外拒之恐致變陽諾曰吾橐不能容可且持歸待我取之博爾歡至則竟其獄誅毒王者而歸其金于省陛見帝顧謂錫津曰卿舉得其人矣賜黃金五十兩詔莽果事無大小悉統于博爾歡授昭勇大將

軍右衛親軍都指揮使大都則專右衛上都則兼三衛
會伐宋授金吾衛上將軍中書右丞詔分大軍為二右
軍受巴延阿珠節度左軍受博爾歡節度俄無淮東都
元帥罷山東經略司而以其軍悉隸焉遂軍于下邳召
將佐謀曰清河城小而固與昭信淮安泗州為犄角猝
未易拔海州東海石秋遠在數百里之外必不嚴備吾
頓大兵為疑兵以輕騎倍道襲之其守將可擒也師至
三城果皆下清河亦降宋主以國內附而淮東諸城猶

為之守詔博爾歡進軍拔淮安南堡戰白馬湖及寶應掠高郵自西小河入漕河援灣頭斷通泰援兵遂下揚州淮東平益封桂陽德慶二萬一千戶至元十四年討平叛臣珠爾噶岱於德昌賜玉帶文綺與博囉同署樞密院事拜中書右丞行省北京未幾召還時江南新附多反側詔募民能從大軍進討者使自為一軍聽節度於其長而毋役於他軍制命符節皆與正同會博爾歡寢疾乃附樞密董文忠奏曰今疆土寢廣勝兵百萬指

揮可集何假此無藉之徒彼一踐南土則掠人貨財俘人妻孥仇怨益滋而叛者將愈衆矣奏上召與疾賜坐與語帝大悟遂可其奏而常德入訴唐古一軍殘暴其境敕斬以徇凡所募軍皆罷十六年以海拉蘇布爾噶蘇鄂喇昆諸部不相統命博爾歡監之十八年以中書右丞行省甘肅二十年拜御史大夫行御史臺事以疾歸諸王納延叛帝將親征博爾歡諫曰昔太祖分封東諸侯其地與戶臣皆知之以二十為率納延得其九莽

果烏嚕扎拉爾鴻吉哩伊奇喇斯五諸侯得其十一惟
徵五諸侯兵自足當之何至上煩乘輿哉臣疾且愈請
事東征帝乃賜鎧甲弓矢鞍勒命督五諸侯兵與納延
戰敗之其黨塔布岱以兵來拒會久雨軍乏食諸將欲
退博爾歡曰今兩陣相對豈容先動俄塔布岱引兵退
博爾歡以其師乘之轉戰二日身中三矢大破之斬其
駙馬和倫適太師伊嚕諾延大軍來會遂平納延擒塔
布岱既而其黨哈坦復叛詔與諸侯王奈瑪岱討之哈

坦游騎猝至博爾歡從三騎返走抵絕澗可二丈許追騎垂及博爾歡策其馬一躍而過三從騎皆沒人以為有神助云哈坦死斬其子羅丹於陳往返凡四歲凱旋俘哈坦二妃以獻敕以一賜奈瑪台一賜博爾歡陳其金銀器於延春閣上召諸侯三將帥分賜之博爾歡辭帝曰卿可謂能讓賜金銀器五百兩以旌之授河南宣慰改行中書省拜平章政事有詔括馬母及勲臣之家博爾歡曰吾馬成羣所治地方三千里不先出馬何以

為吏民之侶乃先入善馬十有八汴南諸州莽為巨浸
博爾歡躬行決口督有司繕完之三十二年成宗立遷
陝西行中書省平章政事未行留鎮河南入朝請以泰
安州所入五戶絲四千斤易內庫繒帛分給莽果一軍
帝為敕遞車送軍中賜以銀百五十兩陞辭帝諭之曰
卿今白鬚世祖德言實多聞之宜加慎護因以世祖所
佩弓矢鞶帶賜之有頃近臣奏伐宋時右軍分屬巴延
阿珠左軍分屬博爾歡今巴延阿珠皆受分地而博爾

歡未及惟帝裁之帝曰何久不言豈彼恥自請耶乃益封高郵五百戶大德元年叛王永和爾烏魯斯布哈來歸博爾歡聞之特遣使馳奏曰諸王之叛皆由其父此輩幼弱無所與知今茲來歸宜棄其前惡以勸未至帝深以為然賜金鞍勒命以平章政事行省湖廣會并福建行省入江浙拜光祿大夫上柱國江浙等處行中書省平章政事居歲餘卒年六十三博爾歡勇有智略戰常以身先之所獲財物悉與將士故得其死力平居常

以國事為憂聞變即請行至終其事乃止其忠義蓋天性然也累贈推忠宣力贊運功臣太師開府儀同三司上柱國加封奉安王謚武穆子昆都巴圖額森特穆爾博囉昆都山東宣慰使遙授中書平章政事額森特穆爾河南江北等處行中書省左丞相卒官開府儀同三司翰林學士承旨博囉陝西等處行中書省平章政事額森特穆爾子尼瑪僧格襲郡王伊實嘉勒幹僧格中政使

巴圖幼穎異不以家世自矜長嗜書史大德五年擢江東道廉訪副使拜江南行臺侍御史未幾召入僉樞密院事領實喇卜沁至大二年出為江南行臺御史中丞遷陝西行臺御史大夫延祐元年拜甘肅行省平章政事時米價騰湧陸輓每石費二百緡乃為經畫計所省至四百餘萬緡自是諸倉俱充溢甘州氣寒地瘠少稔歲民饑則發粟賑之春闕種則貸之於是兵饟既足民食亦給詔賜名鷹甲冑弓矢及鈔五千緡以勞焉四年

移江浙行省平章政事入為太子賓客上書陳古先聖
王正心修身之道帝嘉納之遷江南行臺御史大夫皇
太后謂東宮官不宜使外止其行遂以疾辭去寓居高
郵英宗即位復命為江南行臺御史大夫陞見以疾固
辭帝慰諭久之命以平章之祿歸養于家復賜鈔十萬
緡所服藥須空青詔遣使江南訪求之已圖辭謝曰臣
翼膚重寄深懼弗稱今已病廢况敢叨濫厚祿以受重
賜乎併以所給平章政事祿歸有司泰定元年還京師

卒朝廷知其貧賻鈔二萬五千貫御史臺奏賻三萬五千貫仍還所辭祿妻鴻吉哩氏弗受曰始巴圖仕于朝不敢虛受廩祿今歿矣苟受是祿非其意也卒辭之子多爾濟將作院判官

察蘇

察蘇奈曼部人又號曰達魯其先迪延為奈曼部主祖庫楚類父察罕太祖舉兵討不庭庫楚類失其部落察罕奔契丹卒察蘇尚幼與其母間行來歸太祖奉中宮

旨侍宮掖察蘇年二十五歲即從征伐破代石二州不
避矢石每先登焉鴈門之戰屢捷會太宗命睿宗平金
察蘇執銳以從與金兵戰所向無前壬辰兵次鈞州金
兵壘于三峯山察蘇察其營壁不堅夜領精騎襲之金
兵驚擾遂乘擊之拔三峯山睿宗以察蘇功聞于朝有
旨以湯陰縣黃招撫等一百一十七戶賜之察蘇力辭
不受復賜以男女五十口宅一區黃金犍帶酒壺盃盂
各一辭弗許乃受之制受萬戶與內侍呼圖克魯沁僉

起西京等處軍人征行及鎮守隨州招集民戶每千人以官一員領之丁酉秋七月奉旨調軍得西京大名濱棣懷孟真定河間邢洺磁威新衛保等府州軍四千六十餘人統之後移鎮潁以疾歸大名歲戊申正月卒年四十四子布敦

布敦之在襁褓時父察蘇方領兵平金與其祖母喀喇氏在三皇后宮庭戊申父察蘇卒母張氏乃迎布敦以歸祖母喀喇氏卒張嘗從容訓之曰人有三成人知恐

懼成人知羞恥成人知艱難成人否則禽獸而已布敦
受母教惟謹甲寅世祖以宗王鎮黑水有旨諭察罕諾
延命布敦襲察蘇職為副萬戶鎮守隨賴等處丙辰冬
十有二月世祖復諭征鎮軍士悉聽布敦等號令布敦
狀甚偉身長七尺餘肩豐多力善刀舞尤精騎射士卒
咸畏服之明年庚申世祖即位委任尤專癸亥正月召
赴行在所冬十一月謁見世祖於行在所世祖賜以金
符命布敦為隨賴二州屯田府達嚕噶齊時二州地多

荒蕪有虎食民之妻其夫來告布敦默然良久曰此易
治耳乃立檻設機縛羔羊檻中以誘虎夜半虎果至機
發虎墮檻中因取射之虎遂死自是虎害頓息至元十
三年授明威將軍信陽府達嚕噶齊佩金符時信陽亦
多虎布敦至任未久一日以馬褐置鞍上出獵命左右
燔山虎方出走布敦以褐擲虎虎搏褐據地而吼布敦
旋馬視虎抽矢射之虎殪十六年進宣威將軍常德路
副達嚕噶齊會同知李明秀作亂布敦請以單騎往招

之直抵賊壘賊輕之竟不設備布敦至諭以朝廷恩德
使速為自新計明秀素畏服遂與俱來布敦聞于朝廷
秀伏誅賊遂平三十一年進懷遠大將軍遷池州路達
嚕噶齊之官道經潁上潁近荆山有野豕時出沒害民
禾稼民苦莫能制開布敦至迎拜境上告以其故布敦
曰毋慮也遂至荆山以狼牙箭射之豕走數里大德十
三年進昭勇大將軍台州路達嚕噶齊卒年八十一子
布哈僉嶺南廣西道肅政廉訪司事文圭有隱德贈秘

書監著作郎延壽湯陰縣達嚕噶齊孫守恭曾孫與權
皆讀書登進士科人皆稱之

元史卷一百二十一

元史卷一百二十一考證

蘇布特傳歲辛未攻金桓州先登拔其城 辛未原文
作壬申按壬申為太祖七年金衛紹王崇慶元年也
宋元通鑑載元兵破金昌桓撫三州在大安三年是
年為辛未核之金史亦同今據改

是歲太宗崩 是歲原文作壬寅按太宗在位十三年
崩年為辛丑傳誤今改正

烏蘭哈達歲癸巳領兵從定宗征大真國破萬努於遼東

癸巳原文作乙巳按萬努之擒在太宗五年是為
癸巳歲見本紀及宋元通鑑此作乙巳相去計十三
載舛甚又大真原文作女真按萬努於太祖十年據
遼東僭國號曰大真至十一年降既而復叛僭稱東
夏亦詳本紀今據改

博羅爾 原文作字烈兒他卷同繼從諸王句字烈兒
上衍阿字與下文字烈兒似兩部今從刪

戊申定宗崩 原文作己酉按憲宗於辛亥歲即位前

此已酉庚戌兩年國中虛位不得以已酉屬之定宗也今改正

大酋高昇 按本紀作高祥志作高泰祥互異

魯廝國大懼 原文魯字上又衍一魯字從上文刪

阿勒楚爾傳已卯太祖西征塔實干 已卯原文作甲

戌據本紀改

皇子嘉其材勇 原文作皇兄考諸王表太宗之兄卓

齊爾察罕台二人是時並未在行間當從上文皇子

庫騰改子為是至庫騰雖持節專征其賜號及拜授
元帥自當請命朝廷並於賜名上增太宗二字為合
隴西州縣方平 原文西字誤入於人心猶貳句下今

按文義改正

癸卯破資州

原文作癸亥按續通鑑蒙古兵入蜀在

宋理宗淳祐三年乃蒙古太宗六皇后稱制之二年

也是歲為癸卯傳作癸亥不特與通鑑本紀不符即

干支亦不合

博爾歡傳至元十四年 按上文祇稱中統三年十四

年上當增至元二字與紀年之例方合

授河南宣慰 原文脫授字前後官階不明今增

布敦傳以為隨潁二州屯田府達魯噶齊 隨潁原文

作壽潁按納顏金臺集有達魯特將軍射虎詩蓋謂

布敦也序稱其由隨潁萬戶出守信陽今據改

